

四庫全書

集部

欽定四庫全書

唐文粹卷九

宋 姚鉉 編

古賦十首

修身一

動靜交相養賦

白居易

哀樂愁思八

懷忠賦

歐陽詹

泛渭賦

白居易

望賦

劉禹錫

惜餘春賦

李白

江上愁心賦

張說

別知賦

韓愈

愛而不見賦

蕭穎士

傷往賦

劉禹錫

夢一

夢渴賦何諷

動靜交相養賦

井序

白居易

居易常見今之立身從事者有失於動有失於靜斯由  
動靜俱不得其時與理也因述其所以然用自儆導命  
曰動靜交相養賦云

天地有常道萬物有常性道不可以終靜濟之以動性  
不可以終動濟之以靜養之則兩全而交利不養之則  
兩傷而交病故聖人取諸震以發身受以復而知命所

以莊生曰智養恬易曰蒙養正者也吾觀天文其中有  
程日明則月晦日晦則月明明晦交養晝夜乃成吾觀  
歲功其中有信陽進則陰退陽退則陰進進退交養寒  
暑乃順且躁者本於靜也斯則躁為民靜為君以民養  
君教化之根則動養靜之道斯存且有者生於無也斯  
則無為母有為子以母養子生成之理則靜養動之義  
明矣所以動之為用在氣為春在鳥為飛在舟為楫在  
弩為機不有動也靜將疇依所以靜之為用在蟲為蟄

在水為止在門為楗在輪為柅不有靜也動奚資始則知動兮靜所伏靜兮動所倚吾何以知交養之然哉以此有以見人之生於世出處相濟必有時而行非匏瓜不可以長繫人之善其身枉直相循必有時而屈故尺蠖不可以長伸嗟夫今之人知動之可以成功不知非其時動亦為凶知靜之可以立德不知非其理靜亦為賊大矣哉動靜之際聖人其難之先之則過時後之則不及時交養之間不容毫釐故老氏觀妙顏子知幾噫

非二君子吾誰與歸

懷忠賦 并序

歐陽詹

丙寅歲因受譴季冬之月次于殷墟歷闕龍逢墓焉昔  
聆其風未嘗不迴腸實涕覩夫塋壟心又增傷遂寫憤  
于言為賦以弔先生以忠諫致命故以懷忠命篇云

天生彼辛兮用殲覆于夏家欲悠悠而罔極毒浩浩而  
無涯無辜殞身肆市朝之若莽有道併命委炮烙以如  
麻伊先生之諤諤為酷烈之所加嘗披圖於往載每廢

卷以興嗟蕭條舊邑莽蒼空陂陷陵成坎古木無枝或  
人曰此其墓也又一倍以增悲嗚呼麟非騰噬之儔詎  
虎狼之共穴鳳實仁靈之類豈鷹鷂之同列惟玉石之  
明分亦薰蕕之自別是以蹇蹇心競昂昂面折彼炎炎  
之原燎信撲撲而不滅寧歸死以申懷不貪生而結舌  
痛矣哉古人有言輔仁者天福善者神胡為是日功不  
如人使典章之不信俾忠義之空勤律中大呂日臨蒙  
谷風颼颼於衰草煙茫茫乎平陸思悽悽而填臆淚淫



淫以盈目義則非其知友親故遠夫骨肉節臨危而不  
撓行於艱而彌篤惟其有之是以傷之而慟哭

泛渭賦并序

白居易

右丞相高公之掌貢舉也予以鄉貢進士舉及第左丞  
相鄭公之領選部也予以書判拔萃登科十九年天子  
並命二公對掌鈞軸朝野無事人物甚安明年春予為  
校書郎始徙家秦中卜居渭上上樂時和歲稔萬物得  
其宜下樂名遂官閒一身得其所既美二公佐清靜之

理又荷二公垂特達之遇發于嗟嘆流于詠歌于時泛舟于渭因為泛渭賦以導其意辭曰

亭亭華山下有人跂兮望兮愛彼三峯之白雲泛泛渭水上有舟沿兮沂兮愛此百里之清流以我為太平之人兮得於斯而優游又感陽春之氣熙熙兮樂天和而不憂曰予生之幸兮時哉時哉當皇唐受命之九葉兮夷與華而無氛埃及皇帝纘位之二紀兮命高與鄭為鹽梅二賢兮爰立四門兮大開凡讀儒書與履儒行者

率充賦而四來雖片藝而必收兮故不棄予之小才感  
再遇于知己心慙忤以徘徊登予名于太常署予職于  
蘭臺臺有蘭兮閣有芸芳菲菲兮可襲備一官而無事  
又不維而不繫家去省兮百里每三旬而一入川有渭  
兮山有華澹悠悠其可賞目白雲兮漱清流且或偃而  
或仰門去渭兮百步常一日而三往夜分兮扣舷天無  
雲兮水無煙遲遲兮明月波淡灩兮棹寅緣日暮兮舟  
泊草萋萋兮沙漠漠習習兮春風岸柳動兮渚花落發

浩歌以長引舉濁醪而緩酌春冉冉兮其將盡予何為  
乎不樂鳥樂兮雲際鳴嚶嚶兮飛裔裔魚樂兮泉底翬  
撥撥兮尾澌澌我樂兮聖代心融融兮神泄泄伊萬物  
各得其樂者由聖賢之相契賢致聖于無為聖致時于  
既濟凝為和兮聚五福發為春兮銷六沴不我後兮不  
我先適當我兮生之世彼鱗蟲與羽族咸和樂而不知  
惠我為人兮最靈所以愧賢相而荷聖帝樂乎樂乎泛  
于渭兮詠而歸聊逍遙以卒歲

望賦

劉禹錫

邈不語兮臨風境自外兮感從中明晦轉續兮八極鴻  
蒙上下交氣兮羣生異容發孤照于寸眸驚遐情乎太  
空物乘化兮多象人遇時兮不同嗟乎有目者必騁望  
以盡意當望者必緣情而感時有待者瞿瞿忘懷者熙  
熙慮深者瞠然若喪樂極者沖然無違外徙倚其如一  
中糾紛兮若斯望如何其望最樂晞慶霄兮遡阿閣如  
雲兮天顏咫尺如草兮臣心踴躍扇交翟兮歲蕤旗升

龍兮蠓略日轉黃道天開碧落凝瑞景于庭樹掬飛煙  
於殿幕望如何其望且惟登瀛岸兮見長安紛擾擾兮  
紅塵合鬱葱葱兮佳氣盤池象漢兮昭回城依斗兮闌  
干避御史之驄馬逐倖臣之金丸望如何其望彼好宗  
萬靈兮越四隩漢帝仙臺兮秦皇海嶠霓衣踴乎河上  
馬跡窮乎越徼紫氣度關而斐蠢神光屬天而照耀睨  
眷眷以馳精聳專專而觀妙望如何其望有形視蠢蠢  
兮窮冥冥楚塞氛惡兮蕭關燧明暈籠孤月角奮長庚

沙多似雪磧有疑城煙雲非女子之氣草木盡王者之  
兵審曳柴之虛警破來騎之先聲信有得于風鳥示無  
言于旆旌望如何其望且慕恩意隔今年光驚雕輦已  
辭兮金屋何處長信草生兮長門日暮倏翠華之儻來  
仰玄天以自訴況復湘水無還漳河空注淚染枝葉香  
餘紉素風蕭蕭兮北渚波煙漠漠兮西陵樹夫不歸兮  
江上石子可見兮秦原墓抬琴翻朔塞之音挾瑟指邯  
鄲之路望如何其望最傷佩環玦兮思帝鄉龍門不見

兮雲霧蒼蒼喬木何許兮山高水長春之氣兮悅萬族  
獨含嘖兮千里目秋之景兮懸清光偏結憤兮九回腸  
羨環拱于白榆惜馳暉于落棠諒衡斗兮誰見伊戴盆  
兮何望平聲豈止蘇武在胡管寧浮海送飛鴻之滅沒附  
陰火之光彩鶴頸長引烏頭未改恨已極兮平原空起  
何時兮東山在永望如何傷懷孔多降將有依風之感  
宮人成憶月之歌歌曰張衡側身愁思久王粲登樓日  
迴首不作渭濱垂釣臣羞為洛陽拜塵友



惜餘春賦

李白

天之何為令北斗而知春兮迴指于東方水蕩漾兮碧  
色蘭歲蕤兮紅芳試登高而望遠極雲海之微茫覓一  
去兮欲斷淚流頰兮成行吟青楓而詠滄浪懷洞庭兮  
悲瀟湘何餘心之縹緲兮與春風而飄揚飄揚兮無限  
念佳期兮莫展平原萋兮綺色愛芳草兮如翦惜餘春  
之將闌每為恨而不淺漢之曲兮江之潭把瑤草兮思  
何堪想遊女於峴北愁帝子于湘南恨無極兮心氤氳

目眇眇兮憂紛紛披衛情于淇水結楚夢于陽雲春每  
歸兮花開花已闌兮春改嘆長河之流春送馳波于東  
海春不留兮時已失老衰颯兮情逾疾恨不得挂長繩  
於青天繫西飛之白日若有人兮情相親去南國兮往  
西秦見遊絲之橫路網春輝以留人沈吟兮哀歌躑躅  
兮傷別送行子之將遠看征鴻之稍滅醉愁心於垂楊  
隨柔條以糾結望夫君兮興咨嗟橫涕淚兮怨春華遙  
寄影於明月送夫君於天涯

江上愁心賦

張說

江上之峻山兮鬱崎嶇

音儀

而不極雲為峰兮煙為色歟

變態兮心不識江上之深林兮杳冥蒙而不已鳥為花  
兮猿為子紛盪漾兮言莫擬夏雲陰兮若山秋水平兮  
若天冬沙飛兮淅淅春草靡兮芊芊感四節之默運知  
萬化之潛遷伴衆鳥兮寒渚望孤帆兮日邊雖欲貫愁  
腸於巧筆紡離夢于哀絃是心也非模放之所逮將有  
言兮是然將無言兮是然

別知賦

韓愈

予取友於天下將歲行之兩周下何深之不即上何高  
之不求紛擾擾其既多或喜能而好修寧安顯而獨裕  
顧阨窮而共愁惟知心之難得斯百一而為收歲癸未  
而遷逐侶蟲蛇於海陬遇夫人之來使闢公館而羅羞  
索微言于亂志發孤笑於羣憂物何深而不考理何隱  
而不抽始參差以異序卒爛漫而同流何此懽之不可  
恃遂駕馬而迴輶山噉噉其相軋樹蓊蓊其相樛雨浪

浪其不止雲浩浩其常浮知來者之不可以數哀去此而無由倚郭郭而掩涕空盡日以遲留

愛而不見賦

蕭穎士

嗟乎或愛之而不見者有矣何必周秦異代夷夏殊軌阻嚴城之九重限方舟之一水苟時事之多怨故人遐而室邇關山起於足下堂上遠乎千里聳專專之目成遽時逝而復止詩人所以思婉孌而搔首賦城隅之有俟吁不得其已也惟夙昔之良會夢佳期于北方款渤

海之三山吸流霞之景光含芳辭以貺予云惠好之不  
忘顧服義之永日陪遊嬉於帝鄉廣莫忽其飄怒鯨波  
洶而騰張俄驚魂以輟寐問窮髮之茫茫將揭厲以復  
從馭風濤之匪量思投軀以靡吝撫遺體以兢惶晨切  
切以悽愴夕屏營以彷徨追前懼之俯邇歎此恨之悠  
長於是收神返慮澄澹靜默冥然就寢兀若無識冀良  
宵之復遇希舊遊之可即徒有願兮且未克憂深沉兮  
萃胷臆風兮雨兮思君子兮何極

傷往賦

并序

劉禹錫

人之所以取貴於蜚走者情也而誕者以遺情為智豈  
至言耶予受室九年而鰥痛若人之天關弗遂也作賦  
以傷之冀夫覽者有以增伉儷之重云

歎獨處之邑邑兮憤伊人之我遺情可殺而猶毒境當  
懽而復悲人或朝嘆而暮息夫何越月而逾時太極運  
乎三辰轉寒暑而下馳有歸于無兮盛復于衰猶昧爽  
之必暮又安得而怨咨我今怨夫若人兮曾旭旦而潛

暉飄零日及之萼倏忽蜉蝣之衣川走下而不還露迎  
陽而易晞恩已甚矣難絕見無期兮永思我行其野農  
民桑者舉案來饁亦在林下我觀于途裨販之夫同荷  
均挈荆釵布襦羽毛之蕃鱗介之微和鳴灌叢雙泳連  
漪薨薨者蟲蠢蠢伊豸遊空穴深兩兩相比何動類之  
萬殊必雄雌而與俱物莫失儷以孤處我方蹢蹢而焉  
如我復虛室目淒涼兮心伊鬱心伊鬱兮將語誰坐匡  
牀兮撫嬰兒何所丐沐兮何從仰飴襦袴在身兮昔園



差跌鞮囊附臂兮餘馥歲蕤誠天性之潛感顧童心兮  
如疑曉然有難繼之慕漠然滅好弄之姿指遺桂兮能  
認慙空帷兮欲歸我入寢宮痛人亡兮物改其容寶瑟  
僵兮絃柱絕瑤臺傾兮鏡奩空寒爐委灰虛幌多風隙  
駟晨轉牕蟾夜通步搖昏兮網粘翡翠芳褥掩兮塵化  
蛩蛩閱刀尺之餘澤見巾箱之故封翫服儼兮猶具繁  
華謝兮焉從想翩翩於是非求僊宰與冥蒙信奇術之  
可致嗟此生兮不逢徒注視以寂聽恍神疲而目窮還

抱影以獨出紛百哀而攻中系曰龍門風霜苦別鶴哀  
鳴夜銜羽吳江波浪深雌劒一去無遺音悲之來兮憤  
予心洵如行波游浸淫悵緣情而莫極思執禮以自箴  
已焉哉苒苒生死悠悠古今乘彼一氣兮聚散相尋或  
鼓而興或罷而沈以無涯之情愛悼不駐之光陰諒自  
迷其有分徒終怨于匪忱彼蒙莊兮何人予獨累嘆而  
長吟


夢渴賦

何 諷

不宿食以晨飲困鍾盃以沈寢永春晝而高局墮幅巾  
而橫枕及乎酒適衷腸神遊異方煙生喉舌愔然如狂  
爰瞰甃以窺汲諒不任於呼吸俄據河而俯瀆乃器舟  
而杯斛倒魚鼈之窟宅見蛟龍之委伏猶胃腸之不浹  
資宴飲而未足由是奔九江走五湖手不暇於幹運心  
不息於躊躇見波漸竭而百川如綫岸益高而底淤將  
枯腹慊爾而未覺肺燥然而不濡尋至大漠茫然連清  
豈爾浩瀚而吾量不盈斟酌未幾倏見涯涘百靈稽首

乞留濡漑吾腹未充豈汝為意俄傾竭於浩渺奄滴瀝  
而無漬瑤宮貝闕盡列平地三山赤城可以步至鯨鯨  
噉喙相煦以咽大鵬驚攫巨鰲愕眙四顧燥涸悵然興  
情此情何奇非吾所知恨滄海之可罄不足充吾之所  
思周遭有截瑰然埽堞水府萬族咸呼帝闕帝且不聞  
吾欲未竭方將尋蟻垤期耿恭問姜母以何在訪舒姑  
而欲從辨夸父於渭上弔相如於臨邛萬計已盡六腑  
如燼窻日斜照飛蚊遶鬢既驚既覺可嘆可笑飲不盡

器枯腸已療措願沈吟其意逾深以吾此日之一夢見  
自古不足者之心



唐文粹卷九

欽定四庫全書

集部

唐文粹卷十一

詳校官庶吉士臣謝恭銘

助教臣常循覆勘

總校官檢討臣何思鈞

校對官編修臣盧遂

謄錄監生臣任銜萱

欽定四庫全書

唐文粹卷十

宋姚鉉編

古調甲

摠一百四十六首

古今樂章

一百三十六首

琴操

一十首

古樂章

補樂歌十篇

元結

補九夏歌系文九篇

皮日休

今樂章

冬至日祀昊天圓丘樂章八首

魏徵等作

開元樂章十九首

張說

玄宗開元十三年封泰山祀天樂章十三首

正月上辛祈穀於南郊樂章三首

褚亮

季秋享上帝於明堂樂章一首

祀五方上帝于五郊樂章二十首

魏徵等作



祀朝日樂章三首

貞觀中

祀夕月樂章三首

貞觀中

睿宗太極元年登黃地祇於方丘樂章十一

首

盧從愿等作

玄宗開元十三年禪社首山祭地祇樂章八

首

賀知章

登太社樂章三首

魏徵等作

享龍池樂章十首

姚崇等作

享太廟樂章六首

郭子儀等作

儀坤廟樂章九首

徐彥伯等作

琴操十首

韓愈

補樂歌十篇

井序

元結

自伏羲氏至於殷室凡十代樂歌有其名亡其辭考之  
傳記其義或存焉嗚呼樂聲自太古始百世之後盡亡  
古音嗚呼樂歌自太古始百世之後遂亡古辭今國家  
追復純古列祀往帝歲時薦享則必作樂而無雲門咸

池韶夏之聲故探其名義以補之誠不足全化金石反  
正宮羽而或存之猶乙乙冥冥有純古之聲豈幾乎司  
樂君子導和焉爾凡十篇二十章各引其義以序之命  
曰補樂歌

網罟伏羲氏之樂歌也其義蓋稱伏羲能易人取禽獸  
之勞

吾人苦兮水深深網罟設兮水不深吾人苦兮山幽幽  
網罟設兮山不幽

右網罟二章章四句

豐年神農之樂歌也其義蓋稱神農教人種植之功  
猗太帝兮其智如神分草實兮濟我生人猗太帝兮其  
功如天均四時兮成我豐年

右豐年二章章四句

雲門軒轅氏之樂歌也其義蓋言雲之出潤益萬物如  
帝之德無所不施

玄雲溶溶兮垂雨濛濛類我聖澤兮涵濡不窮黃雲漠

漢兮含暎逾光邈我聖德兮溥被無方

右雲門二章章四句

九淵少昊氏之樂歌也其義蓋稱少昊之德淵然深遠  
聖德至深兮齋齋如淵生類娛娛兮孰知其然

反娛許其

右九淵一章章四句

五莖顓頊氏之樂歌也其義蓋稱顓頊得五德之根莖  
植植萬物兮脩脩根莖五德涵柔兮泯泯

反房戎

而生其生

如何兮袖袖

反以周

天下皆自我君兮化成

右五莖一章章七句

六英高辛氏之樂歌也其義蓋稱帝嚳能總六合之英  
華

我有金石兮擊拊淙淙與汝歌舞兮上帝之風由六合  
兮英華淪淪我有絲竹兮韻和泠泠與汝歌舞兮上帝  
之聲由六合兮根柢羸羸

右六莖二章章六句

咸池陶唐氏之樂歌也其義蓋稱堯德至大無不備全

元化油油兮孰知其然至德汨汨姑沒反兮順之以先元

化泥泥音尾兮孰知其然至道泱泱兮由之以全

右咸池二章章四句

大韶有虞氏之樂歌也其義蓋稱帝舜能紹先聖之德  
森森羣象兮日見生成欲聞朕初兮玄封冥冥洋洋至  
化兮日見深柔欲聞涵濩兮大淵油油

右大韶二章章四句

大夏有夏氏之樂歌也其義蓋稱禹治水其功能大中

國

茫茫下土兮乃生九州山有長岑兮川有深流茫茫下  
土兮乃均四方國有民人兮野有封疆茫茫下土兮乃  
歌萬年上有茂功兮下戴仁天

右大夏三章章四句

大護有殷氏之樂歌也其義蓋稱湯救天下護然得所  
萬姓苦兮怨且哭不有聖人兮誰護育聖人生兮天下  
和萬物熙熙兮舞且歌



右大護二章章四句

補九夏歌系文九篇

并序

皮日休

周禮鐘師掌金奏九樂事以鐘鼓奏九夏按鄭康成注  
云夏者大也樂之大者歌有九也九夏者皆詩篇銘頌  
之類也此歌之大者載在乎樂章樂崩亦從而亡是以  
頌不能具也嗚呼吾觀之魯頌其古也亦以久矣九夏  
亡者吾能頌乎夫大樂既去至音不嗣頌於古不足以  
補亡頌於今不足以入用庸何頌乎頌之亡者俾千古

之下鄭衛之內窈窕冥冥不獨有大卷

音拳黃帝樂名

之音者

乎

王夏之歌者王出入之所奏也

燾燾皎日歛麗于天厥明御舒如王出焉燾燾皎日歛  
入于地厥晦惟貞如王入焉出有龍旂入有珩珮勿驅  
勿馳惟慎惟戒出有嘉謀入有內則繫彼臣庶欽王之  
式

王夏四章章四句

肆夏之歌者尸出入之所奏也

愔愔清廟儀儀袞服我尸出矣迎神之穀杳杳陰竹坎坎路鼓我尸入矣得神之祐

肆夏二章章四句

昭夏之歌者牲出入之所奏也

有鬱其鬯有儼其彝九變未作全乘來之既醑既酢爰音屑爰舞象物既降全乘之去

昭夏二章章四句

納夏之歌者四方賓客來之所奏也

麟之儀儀不繫不維樂德而至如賓之嬉鳳之愉愉不  
箏不竽樂德而至如賓之娛自筐及篥我有牢醕自筐  
及篥我有貨幣我牢不愆我貨不匱碩碩其才有樂而  
止

納夏四章章四句

章夏之歌者臣有功之所奏也

王有虎臣錫之鈇鉞征彼不愆一撲而滅王有虎臣錫

之主瓚征彼不享一烘而泮王有掌封道

音偵

爾疆理王

有掌客饋爾饗餼何以樂之金石九奏何以賜之龍旂

九旒

去聲

章夏四章章四句

齊夏之歌者夫人祭之所奏也

璫璫衡筭翬翬翟自內而祭為君之則

齊夏一章章四句

族夏之歌者族人酌之所奏也

金匱要略卷之十一  
洪源誰孕疏為江河大塊孰埏播為山阿厥流浩漾厥  
勢嵯峨今君之酌慰我實多

族夏二章章四句

祴夏之歌者賓出之所奏也

禮酒既酌嘉賓既厚牘為之奏禮酒既竭嘉賓既悅應  
為之節禮酒既罄嘉賓既醒雅為之行

牘應雅三樂器也賓醉而出奏

祴夏以此三器築地為之行節也

祴夏三章章三句

驚夏之歌者公出入之所奏也

桓桓其珪袞袞其衣出作二伯天子是毗桓桓其珪袞袞其服入作三孤國人是福

驚夏二章章四句

冬至日祀昊天圓丘樂章八首

魏徵褚亮虞世南等作

降神用豫和

上靈睠命膺會昌盛德殷薦叶辰良景福降兮聖德遠  
玄化穆兮天歷長

皇帝行用太和

穆穆我后道應千齡登三處大得一居貞禮惟崇德樂  
以和聲百神仰止天下文明

登歌奠玉帛用肅和

闔陽播氣甄曜垂明有赫圓宰深仁曲成日麗蒼壁煙  
開紫營聿遵虔享式降鴻禎

迎俎用雍和

欽惟大帝載仰皇穹始命田燭爰啓郊宮雲門駭聽雷



鼓鳴空神其介祀景祚斯融

酌獻飲福用壽和

八音斯奏三獻畢陳寶祚惟永光輝日新

送文舞出迎武舞入用舒和

疊壁凝影皇壇路編珠流彩帝郊前已奏皇鍾歌大呂  
還符寶歷祚昌年

武舞作用凱安

昔在炎運終中華亂無象鄴郊赤烏見邙山黑雲上大

賚下周車禁暴開殷網幽明同叶贊鼎祚齊天壤

送神用豫和

歌奏畢兮禮獻終六龍馭兮神將昇明德感兮非黍稷  
降福簡兮祚休徵

開元樂章十九首

張說

迎神永和之樂三章

肅九室 諧八音 歌皇慕 動神心 禮宿設 樂

妙尋 聲明備 裸奠臨

律迓氣 音入玄 依玉几 御黼筵 聆愾息 優

周旋 九韶遍 百福傳

信工祝 永頌聲 來祖考 聽和平 相百辟 貢

九瀛 神休委 帝孝成

皇帝行太和之樂一章

時文聖后 清廟肅雍 致誠勤薦 在貌思恭 玉

節肆夏 金鏘五鐘 繩繩雲步 穆穆天容

酌瓚登歌肅和之樂一章

天子孝享 工歌溥將 躬裸鬱鬯 乃蕪膋薌 臭  
以達陰 聲以求陽 奉時蒸嘗 永代不忘

迎俎雍和之樂二章

在滌嘉猷 麗碑敬牲 角握之牡 色純之駢 火  
傳陽燧 水漑陰精 太公胖俎 傳說和羹

齋戒豐潔 俎豆有馨 亦有和羹 既戒既平 鼓  
鐘管磬 肅唱和鳴 皇皇后祖 賚我思成

酌獻用文舞一章

聖謨九德 真言五千 慶集昌胄 符開帝先 高  
文仗鉞 克配彼天 三宗握鏡 六合煥然 帝其  
承祀 率禮罔愆 圖書霧出 日月清懸 舞形德  
類 詠諡功傳 黃龍蜿蜒 綵雲蹁跹 五行氣順  
八佾風宣 介此百福 於皇萬年

宣皇帝室光大之舞一章

肅肅藝祖 滔滔濬源 有雄玉劔 作鎮金門 文  
王餘緒 后稷謀孫 肇裡九廟 四海來尊

光皇帝室長發之舞一章

具禮崇德 備樂承風 魏推幢主 周贈司空 不

行而至 無成有終 神興王業 天歸帝功

景皇帝室大政之舞一章

於赫元命 權輿帝文 天齊八柱 地半三分 宗

廟觀德 笙鏞樂勲 封唐之兆 成天下君

元皇帝室大成之舞一章

帝舞季歷 襲聖生昌 后歌有嶠 胎炎孕皇 天

地合德 日月齊光 肅雍孝享 祚我萬方

高祖神堯皇帝室大明之舞一章

赤精亂德 四海困窮 黃旗舉義 三靈會同 旱  
望春雨 雲披大風 溥天來祭 高祖之功

太宗文武聖皇帝室崇德之舞一章

皇合一德 朝宗百神 削平天下 大拯生民 上

帝配食 單于入臣 戎歌陣舞 晔晔蒸蒸

高宗天皇大帝室鈞天之舞一章

高皇邁道 端拱無為 化懷獯鬻 兵戢句驪 禮

尊封禪 樂盛來儀 合位媯后 同稱伏羲

中宗孝和皇帝室太和之舞一章

退居江水 鬱起丹陵 禮物還舊 朝典中興 龍

圖友及 駿命恭膺 鳴球香璫 大韋是承

睿宗大聖真皇帝室景雲之舞一章

景雲霏爛 告我帝符 噫帝沖德 與天為徒 笙

鏞遙遠 俎豆虛無 春秋孝獻 因復此都



皇帝受福酒酢福和之樂一章

備禮用樂 崇親致尊 誠通慈降 敬徹愛存 獻

懷稱壽 啐感承恩 皇帝孝德 子孫千億 大包  
天域 長亘不極

送文舞迎武舞一章

六鍾翕協六變成 八佾倘佯八風生 樂九韶兮人  
神感 美七德兮天地清

亞終獻武舞凱安之樂四章

瑟彼瑤爵 亞維上公 室如屏氣 門不容躬 禮

殷其本 樂執其中 聖皇所慕 天地幽通

禮币三獻 樂變九成 降循軒陛 仰歆皇情 福

與仁合 德因孝明 百年神畏 四海風行

總總干戚 填填鼓鐘 奮揚增氣 坐作為容 離

若鷺鳥 合如戰龍 萬方觀德 肅肅雍雍

烈祖順三靈 文宗威四海 黃鉞誅羣盜 朱旗掃

多罪 戡兵天下安 約法人心改 大哉干羽意

長見風雲在

撤豆登歌一章

止笙磬 撤豆籩 廓無響 窅入玄 主在室 神在天 情餘慕 禮罔愆 嘉黍稷 屢豐年

送神一章

眇嘉樂 援靈爽 感若來 思如往 休氣息 迴風上 返寂寞 還惚恍 懷虛駕 結空想

玄宗開元十三年封泰山祀天樂章一十二首

降神用豫和六變

夾鐘宮之一

款泰壇 柴泰清 受天命 報天成 竦皇心 薦

樂聲 志上達 歆下迎

夾鐘宮之二

億上帝 臨下庭 騎日月 陪列星 嘉祝信 大

嘏馨 澹神心 醉皇靈

夾鐘宮之三

相百辟 貢八荒 九歌叙 萬舞翔 肅振振 鏘  
皇皇 帝欣欣 福穰穰

黃鍾宮之四

高在上 道光明 物資始 德難名 承眷命 牧

蒼生 寰宇謐 太階平

太簇徵之五

天道無親 至誠與鄰 山川遍禮 宮徵惟新 玉  
帛非盛 聰明會真 正斯一德 通乎百神

姑洗羽之六

饗帝饗親 維孝維聖 緝熙懿德 敷揚成命 華  
夷志同 笙鏞禮盛 明靈降止 感此誠敬

迎送皇帝用太和

孝敬中發 和容外彰 騰華照寓 如昇太陽 真  
璧就奠 文靈垂光 禮樂具舉 濟濟洋洋

登歌奠玉帛用肅和

羽調

真祖配天 承天享帝 百靈咸秩 四海來祭 植

我蒼璧 布我玄製 華日徘徊 神靈容裔

迎俎入用雍和

俎豆有馝 潔粢豐盛 亦有和羹 既戒既平 鼓  
鐘管磬 肅唱和鳴 皇皇后祖 賚我思成

酌獻用壽和

蒸蒸我后 享獻惟寅 躬酌鬱鬯 跪奠明神 孝  
莫孝乎配上帝於親 敬莫敬乎教天下為臣

皇帝飲福酒用壽和

皇祖嚴 配享皇天 皇降嘏 天子萬年

送文舞出迎武舞入用舒和

商調

六鐘翕協六變成 八佾倘佯八風生 樂九韶兮人  
神感 美七德兮天地清

送神用豫和

夾鍾宮調

禮樂終 禋燎上 懷靈惠 結皇想 歸風疾 迴  
天爽 百福來 衆神往

正月上辛祈穀於南郊樂章三首 褚亮



登歌奠玉帛用肅和

履艮斯繩 居中體正 龍運垂祉 昭符啓聖 式  
事嚴禋 聿懷嘉慶 惟帝永錫 時皇休命

迎俎用雍和

殷薦乘春 太壇臨曙 八簋盈和 六瑚登御 嘉  
稷匪歆 德馨斯飫 祝嘏無易 靈心有豫

送文舞出迎武舞入用舒和

玉帛犧牲申敬享 金絲戚羽盛音容 庶俾億齡提

景福 長欣萬寓洽時邕

季秋享上帝於明堂樂章一首

送文舞出迎武舞入用舒和

御宸合宮承寶歷 席圓重館奉明靈 偃武修文九

圍泰 沈烽靜柝八荒寧

祀五方上帝于五郊樂章二十首

魏徵褚亮虞世南等作

祀黃帝降神用宮音

黃中正位 含章居貞 既彰六律 兼和五聲 畢

陳萬舞 乃薦斯牲 神其下降 永祚休平

登歌奠玉帛用肅和

眇眇方輿 蒼蒼圓蓋 至哉樞紐 宅中圖大 氣  
調四序 風和萬籟 祚我明德 時雍道泰

迎俎用雍和

金縣夕肆 玉俎朝陳 饗薦黃道 芬流紫辰 迺  
誠迺敬 載享載禋 崇祀斯在 惟皇是賓

送文舞出迎武舞入用舒和

御徵乘宮出郊甸 安歌率舞遞將迎 自有雲門符  
帝賞 猶持雷鼓答天成

祀青帝降神用角音

鶴雲旦起 鳥星昏集 候啓新風 陽開初蟄 至  
德可饗 行潦斯挹 錫以無疆 蒸人乃粒

登歌奠玉帛用肅和

玄鳥司春 蒼龍登歲 節物變柳 光風轉蕙 瑤  
席降神 朱絃享帝 誠備祝嘏 禮殫珪幣

迎俎用雍和

大樂希音 至誠簡禮 文物斯建 聲名濟濟 六  
變有成 三登無體 迺眷豐潔 恩覃愷悌

送文舞出迎武舞入用舒和

笙歌籥舞屬年韶 鷺鼓鳧鐘展時豫 調露初迎綺  
春節 承雲遽踐蒼宵馭

祀赤帝降神用徵音

青陽告謝 朱明戒序 咸長是祈 敬陳椒醕 博

碩斯薦 笙鏞備舉 庶盡肅恭 非馨稷黍

登歌奠玉帛用肅和

離位克明 火中宵見 峯雲暮起 景風神扇 木

槿初榮 含桃可薦 芬馥百品 鏘洋三變

迎俎用雍和

昭昭丹陸 弈弈炎方 禮陳牲幣 樂備篴簫 瓊

羞溢俎 玉齊浮觴 恭惟正直 歆此馨香

送文舞出迎武舞入用舒和

千里溫風飄絳羽 十枚炎景勝朱干 陳觴薦俎歌

三獻 拊石撝金會七盤

祀白帝降神用商音

白藏應節 天高氣清 歲功既阜 庶類收成 萬

方靜謐 九土和平 馨香是薦 受胙聰明

登歌奠玉帛用肅和

金行在節 素靈居正 氣肅霜嚴 林凋草勁 豺

祭隼擊 潦收川鏡 九穀已登 千箱流詠

迎俎用雍和

律應酉成 氣躔南呂 珪幣咸列 笙竽備舉 苾

苾蘭羞 芬芬桂醕 式資宴貺 用調霜序

送文舞出迎武舞入用舒和

璿儀氣爽驚緹籥 玉呂灰飛含素商 鳴鞀奏管芳

羞薦 會武安歌葆眊揚

祀黑帝降神用羽音

嚴冬季月 星迴風厲 享祀報功 方祈來歲



登歌奠玉帛用肅和

律周玉琯 星回金度 次極陽烏 紀窮陰兔 火

林霰雪 湯泉凝沍 八蜡已登 三農息務

迎俎用雍和

陽月斯紀 應鐘在候 載潔牲牷 爰登俎豆 既

高既遠 無聲無臭 靜言格思 惟神保佑

送文舞出迎武舞入用舒和

執籥持羽 初終曲 朱干玉戚 姑分行 七德九功 咸

已暢 明神降福具穰穰

祀朝日樂章三首 貞觀中作

登歌奠玉帛用肅和

惟聖格天 惟明饗日 帝郊肆類 王宮戒吉 珪

奠春舒 鐘歌曉溢 禮云克備 斯文有秩

迎神用雍和

晨儀式薦 明祀惟光 神物爰止 靈暉載陽 玄

端肅事 紫幄興祥 福履攸假 於昭令王

送文舞出迎武舞入用舒和

崇牙樹羽延調露 旋宮扣律掩承雲 誕敷懿德昭

神武 載集豐功表睿文

祀夕月樂章三首

貞觀中作

登歌奠玉帛用舒和

測妙為神 通微曰聖 坎祀貽則 郊禋展敬 璧

薦登光 金歌動映 以載嘉德 以流曾慶

迎俎用雍和

朏晨爭舉 天宗禮闕 夜典涼秋 陰明湛夕 有

齊斯旨 有牲斯碩 穆穆其暉 穰穰是積

送文舞出迎武舞入用舒和

合吹八風金奏動 分容萬舞玉鞘驚 辭昭茂典光

前烈 夕曜成功表舊明

玄宗開元十一年祭皇地祇於汾陰樂章十一首

林鐘宮

韓思復

大樂和暢 殷薦明神 一降通感 八變必臻 有

求斯應 無德不親 降靈醉止 休徵萬人

太簇角

盧從愿

坤元載物 陽樂發生 播殖資始 品彙咸亨 列

俎棊布 方壇砥平 神歆禋祀 后德惟明

姑洗徵

劉晃

大君出震 有事郊禋 齋戒既肅 馨香畢陳 樂

和禮備 候暖風春 恭惟降福 實賴明神

南呂羽

韓休

於穆濬哲 維清緝熙 肅事昭配 永言孝思 滌  
濯靜嘉 馨香在茲 神之聽之 用受福釐

皇帝行用太和

黃鍾宮

王 峻

於穆聖皇 六葉重光 太原刻頌 后土疏場 寶

鼎呈符 歆雲孕祥 禮樂備矣 降福穰穰

登歌奠玉帛用肅和

蕤賓均之  
夾鍾羽

崔玄暉

聿脩嚴配 展事禋宗 祥符寶鼎 禮備黃琮 祝

辭以信 明德惟聰 介茲景福 永永無窮

迎俎用雍和

黃鍾均之南呂羽

賈曾

蠲我饕餮 潔我膋臠 有豆孔碩 為羞既臧 至

誠無昧 精意惟芳 神其醉止 欣欣樂康

酌獻飲福用壽和

黃鍾宮

蘇頲

禮物斯具 樂章乃陳 誰其作主 皇考聖真 對

越在天 聖明佐神 窅然汾上 厚澤如春

送文舞出迎武舞入用舒和

太簇宮

何鸞

樂奏云闋 禮章載虔 禋宗于地 昭假于天 惟

馨薦矣 既醉歆焉 神之降福 永永萬年

武舞用凱安 黃鍾均之林鍾徵 蔣挺

維歲之吉 維辰之良 聖君紱冕 肅事壇場 大

禮已備 大樂斯張 神其醉止 降福無疆

送神用順和 源光裕

方丘既膳 嘉饗載謐 齋敬畢誠 陶匏貴質 秀

簋豐薦 芳俎盈實 永永福流 其昇如日

玄宗開元十三年禪社首山祭地祇樂章八首



賀知章

迎神用順和

至哉含柔德 萬物資以生 恒順稱厚載 流謙通  
變盈 聖心事能察 層廟陳厥誠 黃祇僊如在  
泰折俟咸亨

皇帝行用太和

肅我成命 於昭黃祇 裴冕而祀 陟降在斯 五  
音克備 八變聿施 緝熙肆靖 厥心匪離

登歌奠玉帛用肅和

黃祗是祗 我其夙夜 寅畏誠潔 匪遑寧舍 禮  
以琮玉 薦厥茅藉 念茲降康 胡寧克暇

迎俎用雍和

夙夜宥密 不敢寧宴 五齊既陳 八音在縣 粢  
盛以潔 房俎斯薦 明德惟馨 尚茲克徧

皇帝酌獻用壽和

惟以明發 有懷載殷 樂盈而返 禮順其裡 立

清以獻 薦欲是親 於穆不已 裒對斯臻

皇帝飲福用福和

穆穆天子 告成岱宗 大裘如濡 執珽有顙 樂  
以平志 禮以和容 上帝臨我 云胡肅邕

皇帝還宮用太和

昭昭有唐 天卑萬國 列祖應命 四宗順則 申

錫無疆 宗我同德 曾孫繼緒 享神配極

送神用靈具醉

代順和

源乾曜

靈具醉 杳熙熙 靈將往 眇𦣻𦣻 顧明德 吐

正辭 爛遺光 流禎祺

登太社樂章三首

魏徵褚亮虞世南等作

登歌奠玉帛用肅和

后土凝德 神功叶契 九域底平 兩儀交際 戊

期應序 陰墉展幣 靈車少留 俯歆樽桂

迎俎用雍和

美報崇本 嚴恭展事 受露流壇 承風啓地 潔

粢登俎 醇犧入饋 介福遠流 羣生畢遂

送文舞出迎武舞入用舒和

神道發生敷九稼 陰陽乘仁暢八埏 緯武經文陶

景化 登祥薦祉啓豐年

享龍池樂章十首

第一章

姚崇

恭聞帝里生靈祉 應報明君鼎業新 既叶翠泉光寶命  
還符白水出真人 當時舜海潛龍躍 此日堯河帶馬巡

獨有前池一小鴈叨承舊惠入天津

第二章

蔡孚

帝宅王家大道邊神馬潛龍涌聖泉昔日昔時經此地  
看來看去漸成川歌臺舞榭宜正月柳岸梅洲勝往年  
莫疑波上春雲少祇為龍飛直上天

第三章

沈佺期

龍池躍龍龍已飛龍德先天天不違池開天漢分黃道  
龍向天門入紫微邸第樓臺多氣色君王鳬鴈有光輝

為報寰中百川水來朝上地莫東歸

第四章

盧懷慎

代邸東南龍躍泉清漪碧浪遠浮天樓臺影就波中出  
日月光疑鏡裏懸鴈沼迴流成舜海龜書薦祉應堯年  
大川既濟慙為楫報德空思奉細涓

第五章

姜皎

龍池初出此龍山常經此地謁龍顏日日芙蓉生夏水  
年年楊柳變春灣堯壇寶匣餘煙霧舜海漁舟尚往還

願以飄飄五雲影從來從去九天間

第六章

崔日用

龍興白水漢興符聖主時乘運斗樞岸上葦葦五花樹  
波中的皦千金珠操環昔聞迎夏啓發匣先來瑞有虞  
風色雲光隨隱見赤雲神化象江湖

第七章

蘇頲

西京鳳邸躍龍泉佳氣休光鍾在天軒后霧圓今已得  
秦王水劍昔當傳恩魚不似昆明釣瑞鶴長如太液仙



願侍巡遊同舊里更聞蕭鼓濟樓船

第八章

李又

星分邑里固人居水游源流萬頃餘魏國君王秤象處  
晉家藩邸化龍初青蒲似騁遊梁馬綠藻疑游宴鎬魚  
自有神靈滋液地年年雲物史官書

第九章

姜晞

靈沼縈迴邸第前浴日涵春寫曙天始見龍臺昇鳳闕  
應如霄漢起神泉石匱渚傍還啓聖桃李初生更有仙

欲化帝國從此受正同河變一千年

第十章

裴 璿

乾坤啟聖吐龍泉  
泉水年年勝一年  
始看魚躍方成海  
即覩龍飛利在天  
洲渚遙將銀漢接  
樓臺直與紫微連  
休氣榮光常不散  
懸知此地是神仙

享太廟樂章六首

玄宗皇帝室廣運之舞

郭子儀

於赫皇祖昭明有融  
惟文之德惟武之功  
河海靜謐車

書混同虔恭孝饗穆穆玄風

肅宗皇帝室惟新之舞

劉晏

漢祚惟永神功中興風驅氛祲天覆黎烝三光再朗庶  
績其凝重熙累葉景命是膺

代宗皇帝室保大之舞

郭子儀

於穆文考聖神昭彰肅勻羣慝含光遠方萬物茂遂九  
夷賓王懌懌雲韶德音不忘

德宗皇帝室文明之舞

鄭餘慶

開邸除暴時邁勛尊三元告命四極駿奔金枝翠葉輝  
燭瑤琨象德億載貽慶湯孫

順宗皇帝室大順之舞

鄭綱

於穆時文受天明命允恭玄默化成理定出震嗣德應  
乾傳聖猗歟緝熙千億流慶

憲宗皇帝室象德之舞

段文昌

肅肅清廟登顯至德澤周八荒兵定四極生物咸遂羣  
盜滅息明聖欽承子孫千億

坤儀廟樂章九首

迎神用永和

林鍾宮

徐彥伯

猗若清廟肅肅熒熒國薦嚴祀坤興淑靈有凡在室有樂在庭臨茲孝享百祿惟寧

皇帝行用太和

黃鍾宮

丘悅

孝哉我后冲乎迺聖道映重華德輝文命慕深視篋情殷撫鏡萬國移風兆人承慶

酌獻登歌用肅和

中呂均之太簇

張齊賢

金匱要略卷之四  
標圭既濯鬱鬯既陳畫帟雲舉黃流土醇儀充獻酌禮  
盛衆裡地察惟孝愉焉饗親

迎俎用雍和

林鍾宮

薛稷

陽靈配德陰魄昭升堯壇鳳下漢室龍興  
天作對前  
疏是凝化行南國道盛西陵造舟集濯無德而稱我粢  
既潔我醴既澄陰陽靈廟光靈若憑德馨惟饗孝思蒸  
蒸

昭成皇后室酌用坤貞

乾道既亨坤元以貞肅雍攸在輔佐斯成外睦九族內  
光一庭克生睿哲祈我休明欽若徽範悠哉淑靈建茲  
清宮于彼上京縮茅以獻潔粢惟馨實受其福期乎億  
齡

飲福酒用壽和

黃鍾宮

徐堅

於穆清廟肅雍嚴祀合福受釐介以繁祉

送文舞出迎武舞入用舒和

胡雄

送文迎武遞參差一始一終光聖儀四海生人歌有慶

千齡孝享肅無虧

撤俎用雍和

黜賓均之夾鍾

負半千

孝享云畢維撤有章雲感玄羽風悽素商瞻望神座祇  
戀匪遑禮終樂闋肅雍鏘鏘

送神

林鍾商

祝欽明

闕宮實實清廟微微降格無象馨香有依式昭纂慶方  
融嗣徽明裡是享神保聿歸

琴操十首



將歸操

韓愈

秋之水兮其色幽幽我將濟兮不得其由涉其淺兮石  
齧我足乘其深兮龍入我舟我濟而悔兮將安歸尤歸  
乎歸乎無與石鬪兮無應龍求

猗蘭操

蘭之猗猗揚揚其香不採而佩於蘭何傷今天之旋其  
曷為然我行四方以日以年雪霜貿貿薺麥之茂子如  
不傷我不爾覲薺麥之茂薺麥之有君子之傷君子之

守

龜山操

龜之氣兮不能為雨  
龜之枿兮不中梁柱  
龜之大兮祇以奄魯  
知將隳兮哀莫予伍  
周公之鬼兮嗟予歸輔

越裳操

雨之施物以孳我何意於彼為  
自周之先其艱其勤以有疆宇  
私我後人我祖在上四方在下  
厥臨孔威敢戲以侮孰荒于門  
孰治于田四海既均越裳是臣

拘幽操

目窈窈兮其凝其盲耳肅肅兮聽不聞聲朝不日出兮  
夜不見月與星有知無知兮為死為生嗚呼臣罪當誅  
今天王聖明

岐山操

我家于豳自我先公伊我承序敢有不同今狄之人將  
土我疆民為我戰誰使死傷彼岐有岵我往獨處爾莫  
余追無思我悲

履霜操

父兮兒寒母兮兒飢兒罪當答逐兒何為兒在中野以  
宿以處四無人聲誰與兒語兒寒何衣兒飢何食兒行  
于野履霜以足母生衆兒有母憐之獨無母憐兒寧不  
悲

雉朝飛操

雉之飛于朝日羣雌孤雄意氣橫出當東而西當啄而  
飛隨飛隨啄羣雌粥粥嗟我雖人曾不如彼雉雞生身

七十年無一妻與妃

別鵠操

雄鵠銜枝來雌鵠啄泥歸巢成不生子大義當乖離江  
漢水之大鵠身鳥之微更無相逢日且可繞樹相隨飛  
殘形操

有獸維狸兮我夢得之其身孔明兮而頭不知吉凶何  
為兮覺坐而思巫咸上天兮識者其誰

唐文粹卷十

欽定四庫全書

唐文粹卷十一

宋 姚鉉 編

古調乙 總四十六首

楚騷體十一

九諷 并系述 皮日休

反招魂 并序

悼賈 并序

效古詩三十五

江有楓一篇

蕭穎士

菊榮五章

有竹一篇

蟬鳴五章

宋華

涼雨一篇

蕭穎士

虞獲子鹿一篇

韋應物

上古之什補亡訓傳十三章

顧況



倬彼我系一首

王勃

元和聖德詩一首

韓愈

鄆州溪堂詩一首

漢隄詩一首

盧肇

有所恨二章

歐陽詹

河之水二章

韓愈

九諷系述

井序

皮日休

在昔屈平既放作離騷經正詭俗而為九歌辨窮愁而

為九章是後詞人撫而為之皆所以嗜其麗詞擲其逸藻者也至若宋玉之九辨王褒之九懷劉向之九歎王逸之九思其為清怨素豔幽快古秀皆得芝蘭之芬芳鸞鳳之毛羽也然自原已降繼而作者皆相去數百祀足知其文難述其辭罕繼者矣大凡有文人不擇難易皆出於毫端者乃大作者也揚雄之文丘軻乎而有廣騷也梁竦之辭班馬乎而有悼騷也又不知王逸奚罪其文不以二家之述為離騷之兩派也昔者聖賢不偶

命必著書以見志況斯文之怨抑歟噫吾之道不為不  
明吾之命未為不偶而見志於斯文者吾懼來世任臣  
之君因謗而去賢持祿之士以猜而遠德故復嗣數賢  
之作以九為數命之曰九諷焉嗚呼百世之下復有修  
離騷章句者乎則吾之文未過不為乎廣騷悼騷也  
粵勾亶之薄俗兮其風狡而且苦吾欲以直道握其邪  
心兮皆騁容而莫顧前誨行兮後止高論仰兮下俯咸  
為吾之儂為愚兮並以吾之靈為傴羗靈脩之乃吾知

兮先職我而為輔奈其臣之信信兮乃不知吾之所撫  
吾欲以明詰之性辨君臣之分兮定文物之數吾欲以  
正訐之道兮進忠賢而退姦豎吾欲以醇醲之化兮反  
當今而為往古吾欲以忖度之志兮定觚圓而反規矩  
念僇覈之在位兮若臯羊之當路內灼怛以為儔兮復  
何知其所慙乃指天而鬱悠兮將天奪乎國祜永惄惄  
以何言兮將求知於吾祖

右正俗

有肪兮點而謂之不絜有泉兮壅而謂之不決有蔭兮

輔而謂之不芳有軸兮輳而謂之不轍聲許遠切唏以

無音兮氣鬱悒而空咽既惄惄以增懼兮又謾謾漫而

不訣誣彭祖以為孺兮譎殤子以為耄夥衆人之難信

兮擗夸者之不悅佞為疵兮何去姦為疣兮莫副音詣

為轡兮莫御謗為玉兮何切彘既膿而必烹兮木方爰

子公切兮必折心轡轡而似車兮思縣縣而如飀手欲動

兮似拳足將行兮如綈既不辨其顏跖兮遂一貫於堯

桀吾哀生之不遲兮奚至死而愀愀念帝座之不燠

朗他

切兮故交光於卷舌既何路以自辨兮遂沒齒而癆刺

右遇謗

靳尚之言兮美如嬋子蘭之氣兮醲於醒既怒睒

音以

相向兮遂裹足而南征面愜愜以奚色兮心懔懔以何

情耳方聰兮忽睽目正視兮忽盲目當午兮便是天方

晝兮不明欲泣兮有血將啼兮失聲望靈脩兮似失出

國門兮若驚軼識怨兮亦緩駟知愁兮復鳴既徜徉兮

夏水復春戀兮南荆嗟余夙秉於大訓兮涵清骨之忠  
貞既貿貿者之莫予容兮向重蒼而自盟既憚路南切仁  
以憑義兮遂鉞信而規規誠將真宰之不仁兮胡為役  
余以此生彼鷺斯之蝨賊兮固不能容乎鵠鴈彼茨菰  
之叢穢兮固不能讓乎杜蘅已矣乎國無人兮莫我留  
將訴帝于玉京

右見逐

荷為裯

丁牛切

兮芰為襪

碑

荃為裾

居勿切

兮薜為褱弭吾

棹兮澧之浦駐吾楫兮湘之湄悲莫悲兮新去國怨莫

怨兮新相思幽篁蕭兮靜晚清漪澹兮去遲湘君欲出

兮風水急帝子不來兮煙雨微芷既老兮白葍

於角切

日

將暮兮紅菱朝浮乎鵲蹠

啼

夕叫乎羈雌擣禮

漾漾兮

不止橫

黃

悠悠兮何之日出沒兮北渚雲依佈兮九疑

既無人以辯余兮又何心而怨咨退不解其悒悒

上音鐸下

悒音悒兮進不知其悵悵寒蛸怨而無聲兮古木悽其寡枝

嗟吾鬼之不反兮千秋萬歲湘中馳



右悲遊

慨天道之不明兮何獨生此大佞若獫狁烏八切之能冠

兮當一國而持柄見亂臣之反詐兮信其主以不競轍

已覆而又遵兮佗五迄切將翻而不整不思心腹之疾兮

又玩膏肓之病竟客死於咸陽兮終不作毒王之幸既

養驕

火胡切

以遺患兮遂倒鈇

音

而授柄將諛臣以肆禍

兮豈上天之付命粵吾大以為不可兮彼以災而為慶

儻靈脩之鬼有知兮刷吾恥於下暝

右憫邪

有美一人兮端憂千喑蔭萬愁兮曾不得以少休腸結

多以莫迴兮淚啼極而不流王孫何處兮碧草極目公

子不來兮清湘滿樓汀邊月色兮曉復曉浦上蘆花兮

秋復秋天沈寥以似萍兮峰巉崿以如抽簣簞颯兮雨

岸杜若死兮霜洲遺余程兮澧之側整余陌兮湘之幽

望女嬃兮种歸夢懷宋玉兮荆門愁欲向天以號咷兮

寸晷不可以少留又不知吾魄之所處兮永冥冥以悠

悠

右端憂

山之巔兮水之涘桂為祠兮蘭為祀執玉桴兮扣雷鼓  
奠金盃兮滴浮蟻薦瓊芳兮望暮雲獻椒醕兮拜寒水  
祝盼嚮以怪談兮巫妖治而魑醉波閃倏兮湘君竹蕭  
疎兮帝子日將暮兮河伯秋正深兮山鬼神之化兮何  
方人之艱兮至此胡不化其邪而為正兮胡不反其戾  
而為義胡不轉其亡而為興兮胡不易其亂而為治但

血食於下國兮罪不少裨於有位吾將乘青螭而駕白  
虬兮謁帝而訴神之累請天弧發鏃兮天枹行箠神速  
悔尤兮俾吾靈脩而易志

右紀祀

粵吾秉志兮絜於瑾瑜芬其德而芳其道兮榮於蘼蕪  
將興國以見罪兮擬佐王而蒙辜彼羣小之茸茸兮如  
慕臭之蚍蜉以大鵬為雀兮以康瓠為觚以衮衣為襍  
兮以黎邱為墟以鄭姬為醜兮以子產為愚以鮑焦為

貧兮以孔聖為誣吾將奮鱗於大空兮奚獨慕此江湖  
吾將發榮於蟠桃兮奚獨守此蒿蕪吾將蕩其魄兮驂  
風輶與軋車謁帝於冥冥之天兮秉其生殺之樞將飄  
飄以高逝兮亦何必懷此佞邪之故都

右捨慕

堯死兮舜滅禹殄兮湯絕似玉兮將沈如金兮永沒行  
以仁兮止以義生以貞兮死以絜念余曾不足以蹈聖  
閭兮亦慕茲而自悅湘浦兮煙深沉江兮風切顧影兮

自憐撫躬兮永訣鬼慘兮神悲雨泣兮泉咽竟汨沒以  
齋淪兮永幽憂而怫鬱湘之山兮未盡湘之流兮不竭  
千秋兮愁雲萬古兮明月靈均之冤兮孰能銷其氣靈  
均之愁兮孰能釋其結來者之自鑒兮無致位於牙孽

右絜死

反招魂并序

屈原作大招魂

或曰景差作  
疑不能明

宋玉作招魂皮子以為忠

放不如守介而死奚招魂為故作反招魂一篇以辨之

辭曰

承溟滓之命兮付余才而輔君君既不得乎志兮余飄  
飄而播遷余將蕩大空而就滅兮君又招余俾復身余  
詣帝以請訣兮帝俾巫陽以筮云巫陽語余以不可歸  
兮故作詞以招君乃下招曰

君兮歸來故都慎不可留些其君雄虺兮其民封狐些  
食民之肝鬲以為其肉兮摘民之髮膚以為其衣些朝  
刀鋸而暮鼎鑊兮上曖昧而下墨眉呆癡些君兮歸來

故都慎不可留些余昔為比干之魂兮干僂而余去些  
未聞干貪生以自招兮余竟潔其所處些君兮歸來故  
都慎不可留些余昔為伍胥之魂兮胥僂而余逝些未  
聞胥貪位以惜生兮執屬鏤而不滯些君兮歸來故都  
慎不可留些余昔為弘演之魂兮演自殘而余行些余  
未聞演惜命以不死兮俾其義而益明些君兮歸來故  
都慎不可留些帝命余以輔君兮亦以君之忠介些今  
以忠而見聞兮尚盤桓而有待些將自富貴而入羈旅



兮其志乃悔些將戀骨肉而惜家族兮何不自裁些梟  
食母而獍食父兮見禽獸之為生些苟殂殘者眉壽兮  
實梟獍而同名些君乎慎勿懷故都之戀歸來乎余為  
君存千古忠烈之榮枯些

悼賈

并序

余嘗讀賈誼新書見其經濟之道大矣哉真命世王佐  
之才也自漢氏革嬴高祖得於矢石不暇延儒人及為  
天子制缺度弛處華而夷是時獨有叔孫生能定朝儀

其制未悉唯生草其書欲以制屈諸侯推定正朔調革  
輿服通流貨幣天不祐漢絳灌興謗竟枉其道出傳湘  
沅生自以不得志哀屈平之放逐及渡湘沈文以弔之  
故其辭曰騁擣九州而相君兮何必懷此故都噫余釋  
生之意矣當戰國時屈平不用於荆則有齊趙秦魏矣  
何不捨荆而相他國乎余謂平雖遭靳尚子蘭之讒不  
忍捨同姓之邦為他國之相宜矣然則生之見棄又甚  
於平當漢時捨文帝則諸侯矣如適諸侯則新書之文

抑諸侯而尊天子也捨諸侯則胡越矣如適胡越則新書之文滅胡越而崇中夏也是以其心切其憤深其詞隱而麗其藻傷而雅余悲生哀平之見棄又生不能自明其道嗚呼聖賢之文與道也求知與用苟不在於一時而在於百世之後者乎其生之哀平歟余之悲生歟吾之道也廢與用幸未可知但不知百世之後得其文而存之者復何人也咸通癸未中南浮至沅湘復沈文以悼之其辭曰

粵炎緒之媯繇兮其國度之未彰天錫生以命理兮冀  
其道之益光偉吳公之知賢兮道其名於文皇既轉刃  
啟軫以召之兮遂位之於上庠愍耄儒之蠢愚兮對天  
問之不臧既羣儒之讓俊兮馳其譽之煌煌嗟大漢之  
不緒兮蚪其賢于汙潢上下溷而不分兮議制削於驕  
王殺僂僂而不制兮斷梓胡與寇攘羌虜坐以侵華兮  
曾不能以抑強餌其嗜之延延兮寔三代之計良念五  
德之更承兮論髓結而不綱乃秉臆以興說兮數用五

而色尚黃又諸侯以開國兮輸其租於咸陽曾不得以  
撫民兮俾其君兮何忘請紆綢以乘印兮各馳化於所  
疆上既悅而欲大用兮遭絳灌與東陽道既擯兮何明  
乃出傳於沅湘浮沅波之翕洳兮或漾棹以夷猶望靈  
均之沒所兮顙頻其心之怊怊尺遙臨汨羅之浩漾兮想  
懷沙之幽憂森樛蘿以翳鬱兮時迸狖以相號霧雨暗  
乎北渚蝸蠃毒乎芳洲景黯沮以不明兮若天悼乎離  
騷香依依兮杜若韻淒淒兮篋篋山隱隱以掃空兮煙

微微而淡秋羌吾不知所感兮淚曠恨以橫流當抱蟻  
於渺藩兮曾無足以少休既炎亂以傷思兮又鵠鷗以  
動愁嗚呼哀哉世既不平領吾道以為非兮吾復何依  
蘋蘭憔悴兮稂莠繁滋麟鳳匿迹兮梟獍騰威哲匠罷  
斧兮拙者構之離婁閉目兮瞽者揚眉子都蒙袂兮敦  
洽騁姿嗚呼哀哉亦先生之尤也胎丑其世之不可兮  
何不解而去位又垂萬世之名兮取捨在此奚自取謗  
於童叟兮乃憫然而為累蓋伊尹三就五就之心兮冀

其民之可治奈惛惛以不悟兮又被之以非議幸一人  
之再覺兮答受釐之與義既辱王以墮駕兮乃冤慟而  
已矣訊曰君不明兮莫我知幽都寂兮和涕歸文懸日  
月兮俟後聖用之大故忽兮其何足悲

江有楓一篇十章

并序

蕭穎士

江有楓思陸鄭二友吳會舊遊且疾讒也君宦于尹府  
以直方不偶見偏讒佞惟古之賢者有避色避言之義  
矯然去之二室之間有槭樹焉與江南楓形胥類憩於

其下而作是詩以貽夫二三子焉

江有楓其葉蒙蒙我友自東于以遊從山有槭其葉漠漠我友徂北于以休息想彼槭矣亦類其楓矧伊懷人而忘于東東可遊矣會之邱矣于山于水于廟于寺于亭于里君子遊焉于以宴喜其樂亶亶粵東可居彼吳之墟有田有庭有朋有書有尊有魚君子居焉惟以宴醕其樂徐徐我朋在矣彼陸之子

彼陸之子淹也如松如杞淑

問不已我友于征彼鄭之子

彼鄭之子愕也如琇如英德音孔



明我思震澤菱芡幕幕寤寐如覲我思剡谿杉篠萋萋  
寤寐無迷有鳥有鳥粵鷗與鷺浮湍戲渚皓然絜素忘  
其猜妬彼何人斯曾足傷懼此懼維何懼寘于羅彼驕  
者子讒言孔多我聞先師體命委和公伯之愬則如予  
何悵然山河惟以嘯歌其憂也哉

菊榮一篇五章

并序

菊榮酬贈離且申志也久寓大邑賢宰宋侯惠而好予  
賦鳴蟬以貺別有懷相規備厥卒章于以報焉

采采者菊芬其榮斯紫英黃萼照灼丹墀愷悌君子佩

服攸宜王國是維大君是毗

宋即太尉文貞公之子也

貽爾子孫百

祿萃之

采采者菊于邑之城舊根新莖布葉垂英彼美淑人應  
家之禎有弦既鳴我政則平宜爾棟崇必復其慶

采采者菊于邦之府陰槐翳柳迺楹近宇彼勞者子喧  
卑是處慨其莫知蘊結誰語企彼高人色斯遐舉

采采者菊于賓之館既低其枝又弱其幹有匪君子是

焉披翫良辰旨酒宴飲無算愴其仳別終焉永歎  
歲方宴矣霜露殘促誰其榮斯有英者菊豈微春華懿  
此貞色人之侮我混于薪棘詩人有言好是正直

有竹一篇七章

并序

有竹懿李新後閣而譙親友也

有竹斯竿于閣之前君子秉心惟其貞堅兮有竿斯竹  
于閣之側君子秉操惟其正直兮彼蔚者竹蕭其森矣  
有開者閣宛其深矣迴簷幽砌如翼如齒冬之宵霰雪

斯瀟我有金鑪煨其以歆夏之日炎景斯鬱我有珍簞  
淒其以粟彼紛者務休其豫矣有旨者酒歡其且矣友  
僚萃止跼萼載韡彼美公之姓兮那歟應積慶兮期予  
惟去之柄兮

蟬鳴一篇五章并序

宋華

蟬鳴感秋興送將歸也僻守外邑而蘭陵子相過詰朝  
言歸賦詩見志以申贈焉

蟬其鳴矣于彼疎桐庇影容跡何往不容嘒嘒其長求

託于風未見君子我心忡忡既見君子樂且有融

彼蟬鳴矣于林之表含風飲露以樂吾道有懷載遷伊誰云保未見君子我心悄悄既見君子披豁予抱

蟬鳴蟬鳴幽暢乎而肅肅爾庭遠近涼颼言赴高柳叢篁間之思而不見如渴如飢亦既覲止我心則夷

蟬鳴伊何時運未與匪歎秋徂怨斯路阻願言莫從鬱悵誰語君子至止慰我延佇何斯違斯脩邇遐舉

歲之秋深蟬其夕吟披衣軒除蕭蕭風林我友來斯言

告離衿何以叙懷臨水鳴琴何以贈言委順浮沈

涼雨一章

并序

蕭穎士

涼雨志楊侯樂賓僚也

習習涼雨泠泠浮颺君子樂胥于其賓僚有女斯天式歌且謠歡言終宵惟以招邀于胥樂兮

虞獲子鹿一篇

并序

韋應物

虞獲子鹿憫園鹿也遭虞之機張見畜於人不得遂其

天性焉

虞獲子鹿畜之城陬園有美草池有清流但見蹙蹙亦  
聞呦呦誰知其思巖谷之游

上古之什補亡訓傳十三章

顧況

上古戀農也

遐哉上古生棄與柱勾龍氏主乃有甫田惟彼甫田有  
萬斯年開利之源無乃塞源一廛亦官百廛亦官嗇夫  
孔艱浸兮曠兮田有螽兮惟馨祀是患豈止餒與寒嗇  
夫咨咨稊盛苗衰耕之耰之襍襍鋤犁手胼足胝水之

蛭螾吮喋我肌我姑自思胡不奮飛東人利百西人利  
百有匪我心胡為不易河水活活萬人逐未俾爾之愉  
悅兮

上古一章

左車憑險也

震為雷兄長之左東方之師也  
憑險不已君子憂心而作是詩

左車有慶萬人猶病曷可去之于黨孔盛敏爾之生胡  
為波迸

左車有赫萬人毒螫曷可去之于黨孔碩敏爾之生胡



為草戚

左車二章

築城刺臨戎也寺人臨戎以墓塹為城壁

築城登登于以作固咨爾寺兮發郊外冢墓死而無知  
猶或不可若其有知惟上帝是愬

築城奕奕于以固敵咨爾寺兮發郊外冢墓死而無知  
猶或不可若其有知惟上帝是謫

築城二章

持斧啓戎士也戎士伐松柏為蒸薪孝子徘徊而作是詩

持斧持斧無翦我松柏兮

持斧一章

十月之郊造公室也君子居公室當思布德行化焉

十月之郊羣木肇生陽潛地中舒達勾萌矐其蔚兮不可以遊息乃煥蒺藜乃夷荆棘乃繇彼曲直匠氏度思登斧以時澤梁蓁蓁無或夭枝有巨根蒂生混茫際呼

吸羣籟萬人揮斤坎坎有厲陸遷水濟百力殫弊審方  
面勢姑博其製作為公室公室既成禦燥濕風日棟之  
斯厚椽之斯密如翼于飛如鱗櫛比繚以周墉城以崇  
階俯而望之矗與雲齊礪砭砭礪藻井旋題丹素之爆  
兮椒桂之馥兮高閣高閣珠綴結絡金鋪爛若不集于  
鳥雀繪事告畢賓筵秩秩乃命旨酒琴瑟琴瑟在堂莫  
不靜謐周環掩闕仰不漏日冬日嚴凝言納其陽和風  
載昇夏日鬱蒸言用于陰涼風颯興有匪君子自賢不

已乃夢乘舟乃夢乘車夢人占之更爽其居炎炎則移  
皎皎則虧木實之繁兮明年息枝爰處若思胡寧不爾  
思

十月之郊一章

燕于巢審日辰也

燕不以甲乙銜泥

燕燕于巢綴葦維戊甲兮乙兮不宜有謬飛龍在天雲  
掩于斗曷日于雨乃曰庚午彼日之差亦孔斯醜昔在  
羲和酒淫不修我筮我龜莫我告繇肩迺征之彛倫九

疇君子授律是禡三五不備罔克攸遂惠此蒸人  
毋廢爾事爾莫我從維來者是冀

燕于巢一章

蘇方諷商胡舶舟運蘇方歲發扶南林邑至齊國立盡  
蘇方之赤在胡之舶其利乃博我土曠兮我居闡兮我  
衣不白兮朱紫爛兮傳瑞暄兮相唐虞之維百兮

蘇方一章

陵霜之華傷不實也

陵霜之華我心憂嗟陰之勝矣而陽不加坎軋陶鈞乃  
帝乃神乃舒乃屯烈烈嚴秋熙熙陽春職生有倫今華  
發非其辰辰屬東方之仁遐想三五黃帝登雲堯年百  
餘二儀分位六氣不渝二景如璧五星如珠陵霜之華  
兮何不妄敷

陵霜之華一章

囷哀閩也

囷音塞閩俗呼子  
為囷父為郎罷

囷生閩方閩吏得之乃絕其陽為臧為獲致金滿屋為

髡為鉗如視草木天道無知我罹其毒神道無知彼受  
其福郎罷別囿吾悔生汝及汝既生人勸不舉不從人  
言果獲是苦囿別郎罷心摧血下隔地絕天及至黃泉  
不得在郎罷前

囿一章

我行自東不遑居也

我行自東山海其空旅棘有叢我行自西壘與雲齊雨  
雪淒淒我行自南烈火滿林日中無禽霧雨淫淫我行

自北燭龍寡色何枉不直我憂京京何道不行兮

我行自東一章

採蠟怨奢也荒巖之間有以纈蒙其身腰藤造險及有  
羣蜂肆毒哀呼不應則上捨藤而下沈壑

採採者蠟于泉谷兮煌煌中堂烈華燭兮新歌善舞弦  
柱促兮荒巖之人自取其毒兮

採蠟一章

倬彼我系一首

王勃兄勵序



倬彼我系舍弟號州叅軍勃所作也傷迫乎家貧道未  
成而受祿不得如古之君子四十強而仕也故本其情  
性源其事業因陳先人之迹以議出處致天爵之艱難  
也

倬彼我系出自有周分疆錫社派別枝流居衛仕宋匡  
羸相劉迺武迺文或公或侯

晉歷崩圻衣冠擾弊粵自太原播徂江蒞禮喪賢隱時  
屯道閉王室如燬生人多殫

伊我有器思逢其主自東旋西擇木開宇田彼河曲家  
乎汾浦天未厭亂吾將誰輔

伊我祖德思濟九埏不常厥所于茲五遷欲及時也天  
豈願焉其位雖屈其言則傳

爰述帝制大蒐王道曰天曰人是祖是考禮樂咸若詩  
書具草貽厥孫謀永為家寶

伊余小子信慙明哲彼網有條彼車有轍思屏人事克  
終前烈于嗟代網卒余來綯

來純伊何謂余曰仕我瞻先達三十方起夫豈不懷高山仰止願言毓德啜菽飲水

有鳥反哺其聲嗷嗷言念舊德憂心忉忉今我不養歲月其滔飮俛從役豈敢告勞

從役伊何薄求卑位告勞伊何來叅卿事名存實爽負信愆義靜言遐思中心是愧

元和聖德詩一首

并序

韓愈

臣愈頓首再拜言曰臣伏見皇帝陛下即位以來誅流

姦臣朝廷清明無有欺蔽外斬楊惠琳劉闢以收夏蜀  
東定青徐積年之叛海內怖駭不敢違越郊天告廟神  
靈歡喜風雨明晦無不從順太平之期適當今日臣蒙  
被恩澤日與羣臣序立紫宸殿下親望穆穆之光而其  
職業又在以經籍教導國子誠宜率先作歌詩以稱道  
盛德不可以詞語淺薄不足以自效為解輒依古作四  
言元和聖德詩一篇凡千有二十四字指事實錄具載  
明天子文武神聖以警動百姓耳目傳示無極其詩曰

皇帝即阼物無違拒曰暘而暘曰雨而雨維是元年有盜在夏欲覆其州以踵近武皇帝曰嘻豈不在我負鄙為艱縱則不可出師征之其衆十旅軍其城下告以福禍腹敗枝披不敢保聚擲首陴外降幡夜豎疆外之險莫過蜀土韋臯去鎮劉闢守後血人于牙不肯吐口開庫啗士曰隨所取汝張汝弓汝伐汝鼓汝為表書求我帥汝事始上聞在列咸怒皇帝曰然嗟遠士女苟附而安則且付與讀命于庭出節少府朝發京師夕至其部

開喜謂黨汝振而伍蜀可全有此不當受萬牛饑肉萬  
甕行酒以錦纏股以紅帕首有恆其兇有餌其誘其出  
穰穰隊以萬數遂劫東川遂據城阻皇帝曰嗟其又可  
許爰命崇文分卒禁禦有安其驅無暴我野日行三十  
徐壁其右關黨聚謀鹿頭是守崇文奉詔進退規矩戰  
不貪殺擒不濫數四方節度整兵頓馬上章乞討俟命  
起坐皇帝曰嘻無汝煩苦荆并洎梁在國門戶出師三  
千各選爾醜四軍齊作殷其如阜或拔其角或脫其距

長驅洋洋無有齟齬八月壬午闕棄城走載妻與妾包  
裹椎乳是日崇文入處其宇分散逐捕搜原剔藪闕窮  
見窘無地自處俯視大江不見洲渚遂自顛倒若杵投  
臼取之江中枷脰械手婦女累累啼哭拜叩來獻闕下  
以告廟社周示城市咸使觀覩解脫繫索夾以砧斧婉  
婉弱子赤立偃僂牽頭曳足先斷腰脅次及其徒體骸  
撐拄末乃取闕駭汗如寫揮刀紛紜爭刳膾脯優賞將  
吏析珪綴組帛堆其家粟塞其庾哀憐陣歿廩給孤寡

贈官封墓周帀宏溥經戰伐地寬免租簿施令酬功急  
疾如火天地中間莫不順序幽恒青魏東盡海浦南至  
徐蔡區外雜虜怛威赦德蹶蹈舞掉棄兵革私習簞  
簠來請來覲十百其耦皇帝曰吁伯父叔舅各安爾位  
訓厥眚晦正月元日初見宗祖躬執百禮登降拜俯薦  
于新宮視瞻梁杞戚見容色淚落入俎侍祠之臣助我  
惻楚乃以上辛於郊用牡除于國南鱗筍毛簠廬幕周  
施開揭磊砢獸盾騰挈圓壇帖妥天兵四羅旂常婀娜



駕龍十二魚魚雅雅霄昇于丘奠璧獻罍衆樂驚作轟  
虺融冶紫焰嘘呵高靈下墮羣星從坐錯落侈哆日君  
月妃煥赫嫋婉瀆鬼濛鴻嶽祇業戕飫沃羶薌產祥降  
嘏鳳凰應奏舒翼自拊赤鱗黃龍逶陀結糾卿士庶人  
黃童白叟踊躍歡呀失喜噎歐乾清坤夷境落褰舉帝  
車迴來日正當午幸丹鳳門大赦天下滌濯剋磔磨滅  
瑕垢續功臣嗣拔賢任耆孩養無告仁滂施厚皇帝神  
聖通達今古聰聰視明一似堯禹生知法式動得理所

天錫皇帝為天下主并包畜養無異細鉅億載萬年敢有違者皇帝勤儉盥濯陶瓦斥遣浮華好此綈紵勅戒四方侈則有咎天錫皇帝多參與黍無召水旱耗于雀鼠億載萬年有富無窶皇帝正直別白善否擅命而狂既翦既去盡逐羣姦靡有遺侶天錫皇帝庖臣碩輔博問遐觀以置左右億載萬年無敢予侮皇帝大孝慈祥悌友怡怡愉愉奉太皇后決于族親濡及九有天錫皇帝與天齊壽登茲太平無怠永久億載萬年為父為母

博士臣愈職是訓詁作為歌詩以配吉甫

鄆州谿堂詩一章

并序

憲宗之十四年始定東平三分其地以華州刺史禮部尚書兼御史大夫扶風馬公為鄆曹濮節度觀察等使鎮其地既一年褒其軍號曰天平軍上即位之二年召公入且將用之以彼之人安於公也復歸之鎮上之三年公為政於鄆曹濮也適四年矣治成制定衆志大固惡絕於心仁形於色竭心力以供國家之職于時沂密

始分而殘其帥其後幽鎮魏不悅于政相扇繼變復歸於舊徐亦乘勢逐帥自署同於三方惟鄆也截然中居四鄰望之若防之制水恃以無恐然而皆曰鄆為虜巢且六十年將強卒武曹濮於鄆州大而近軍所根柢皆驕以易怨而公承死亡之後掇拾之餘剥膚椎髓公私埽地赤立新舊不相保持萬目睽睽公於此時能安以治之其功為大若幽鎮魏徐之亂不扇而變此功反小何也公之始至衆未熟化以武則忿而憾以恩則橫而

肆一以為赤子一以為龍蛇億心罷精磨以歲月然後致之難也及教之行衆皆戴公為親父母夫叛父母從仇讎非人之情故曰易於是天子以為尚書右僕射扶風郡開國伯以褒嘉之公亦樂衆之和知人之悅而侈上之賜也於是為堂於其居之西北隅號曰谿堂以饗士大夫通上下之志既饗其從事陳曾謂其衆言公之畜此邦其勤不亦至于此邦之人累公之化惟所令之不亦順乎上勤下順遂濟登茲不亦休乎昔者人謂斯

何今者人謂斯何雖然斯堂之作意其有謂而暗無詩歌是不考引公德而接邦人於道也乃使來請其詩曰帝奠九壞有葉有年有荒不條河岱之間及我憲考一叔正之視邦選侯以公來尸公來尸之人始未信公不飲食以訓以徇孰飢無食孰呻孰歎孰寃不問不得分願孰為邦蝨節根之螟羊很狼貪以口覆城吹之煦之摩手拊之鑱之石之膊而磔之凡公四封既富以強謂公吾父孰違公令可以師征不寧守邦公作谿堂播播

流水淺有蒲蓮深有蒹葦公以賓燕其鼓駭駭公燕谿  
堂賓校醉飽流有跳魚岸有集鳥既歌以舞其鼓考考  
公在谿堂公御琴瑟公暨賓贊稽經誨律施用不差人  
用不屈谿有蘋菰有龜有魚公在中流右詩左書無我  
斲遺此邦是庥

漢隄詩

盧肇

陰沴姦陽來暴於襄洎入大郛波端若鉞觸厚摧高不  
知其防駭潰顛委萬室皆毀竈登蛟鼉堂集鱣鮪惟恩

若讎母不能子洪潰既涸閑閼其虛以隳我堵以剝我  
廬酸傷顧望若踐丘墟帝曰念嗟朕日南顧流災降厯  
天曷台怒滔滔襄郊梓我嬰孺於惟餘甿飢傷喘呼斯  
為淫瘼孰往膏傳惟汝元寮僉舉明哲我公用諧苴茅  
杖節來視襄人噢咻提挈不日不月嗔乎朴悅乃泳故  
隄陷於沙泥缺落坳圯由東訖西公曰嗚呼漢之有隄  
實命襄人不力乃力則及乃身具鋪與畚漢隄其新帝  
廩有粟帝府有緡爾成爾隄必錫爾勤襄人怡怡聽命



裹澣背囊肩杵奔走蹈舞分之卒伍令以麾鼓尋尺既  
度日月可數登登業業周旋上下披峴斲楚飛石輓土  
舉築殷雷駭汗霏雨疲瘡鰥獨奮有筋膂呀吁來助提  
筐負筥不勞其勞雜沓笑語咸曰盧公來賜我生斯隄  
既成蜿蜿而平確爾山固屹如雲橫漢流雖狂堅不可  
蝕代千年億與天無極惟公之隄昔在人心既築既成  
橫之於南萌渚不峻此門不深今復在茲於漢之陰斯  
隄已崇茲民獲祐覩童相慶室以完富貽於襄人願保

厥壽繫公之功赫焉如畫捍此巨災碎若京阜天子賜之百姓載之族孫作詩昭示厥後


河之水二章

韓愈

河之水去悠悠我不如水東流我有孤姪在海陬三年不見兮使我生憂日復日夜復夜三年不見汝使我鬢髮未老而先化

河之水悠悠去我不如水東注我有孤姪在海浦三年不見兮使我心苦采蘋于山緡魚于泉我徂京師不其

還



唐文粹卷十一